

## MÉTÒD POU PARÉ ÉPRÈV OBLIGATWA KRÉYÒL GWADLOUP (GEREC-F 1)

Chak sijé dékatiyé an 2 mòso:

- **mòso 1: Konprann tèks-la - i ka pézé 10 pwen**

Ou pé séparé pati-lasa adan kat kalité kèsyon :

- **Ki dokiman ki la ?** : idantifyé tèks-la (pasaj a on woman, istwèkout, artik, kont, fab...), trouvé on tit ba tèks-la, ki larèl a tèks-la, ...
- **Ki védiyans (sans) a sé mo-la ?** : bay chouk (non, vèb, ajèktif, advèb, ...) é védiyans a sé mo-la dapré tèks-la.
- **Ki analiz ?** : kèsyon ki ka pèrmèt fouyé tèks-la, konprann istwa-la (kimoun, ola, kitan, kijan, pouki, ki liyannaj...).
- **Mofwazaj** : mofwazé on pasaj adan tèks-la.

- **mòso 2: Esprimé-w - i ka pézé 10 pwen**

Bay grennsèl a-w anlè on lidé ki liyanné èvè tèks-la. Konpozisyon-lasa pou pézé antrè 15 é 30 lin dapré séri-la ou ka pasé la. Adan-y fò tini on pawòl-douvan, on dékatman é on pawòl poubout.

- **pawòl-douvan :**
  - Wouvè déba-la : ou pé sèvi èvè on pawòl fondal kontèl an litérati anliyannaj épi larèl-la
  - Pozé larèl-la é lévé sé kèsyon-la ki pozé la
  - Bay kijan ou k'ay dékatiyé travay a-w (plan-la)
- **Dékatman :**
  - Dékatman-la dwèt ni 2 oben 3 tèz. Chak grennsèl (lidé) ou ka prezanté fò séparé-y an paragaf. Sèvi épi mo zouti (dabòpouyonn, poudé, dapré mwen, men, okontrè, Poudivré, anvré, poubout,...) pou liyanné chak lidé/paragaf
- **Pawòl poubout :**
  - Bout chak lidé fondal. Bay grennsèl anfinal a-w ki ka woupran lidé fondal ou lévé andidan dékatman-la. Sonjé réponn kèsyon ki té pozé andidan pawòl-douvan la.
  - Éséyé wouvè asi on lidé anplis, on lidé nèf ki ka pozé ondòt pwoblenm gran pasé sila ki té lévé la.